

JO. GEORGII PRITII,
SS. Theologiæ Licentiatî & Professoris
Publici,

Oratio Inauguralis

DE LITE

ARCHIEPISCOPO DVCI CAMERACENSI,
FRANCISCO DE SALIGNAC
FENELON,

a quibusdam

GALLIAE PRAESVLIBVS

circa nonnulla Theologiæ mysticæ

capita

Romæ intentata,
in splendidissima panegyri

D. XVI. Decemb. M DC XCI.

dicta,

Quum Professionem Theologiæ & Meta-
physicæ in illustri Gymnasio Anhaltino, quod

SERVESTAE est,


auspicaretur.

LIPSIÆ,

Apud JO. GROSSII viduam & hæredes.

Literis CHRISTOPH. FLEISCHERI,

M DC IC.



ALMAE PATRIAE,
CELEBERRIMAE PHILVRAEAE
ORATIONEM HANC
INAVGVRALEM
SACRAM ESSE
IVBET
AVCTOR.



*V*a a me, sub muneris mei ingressum, coram
illustrissima panegyri, dicta est oratio, eam
tibi, Alma Patria, venerando studio in-
scriptum consecratumque eo. Nec enim con-
veniebat, Lipsia me discedere, ut non sta-
tueretur aliquod a me animi grati monu-
mentum, quo, quam prolixè tibi debeam, &
debiturus sim per omne vitæ meæ tempus,
luculenter declarem. Lipsiensis sum; Lipsia, si paucillum il-
lud temporis, quod Iena a me transactum fuit, excipiam, vel-
ut in dulcissimo Musarum sinu, ad omnem humanitatem ingenii-
que cultum formatum me esse memini. Dulce hic fuit, cum
materno veluti lacte bonarum litterarum amorem imbibere, quem
certe nisi cum vita non videor mihi depositurus. Dulce & nunc
est, regredi in spatium præteriti temporis, quo ex ore virorum,
omni laude dignissimorum, omnigenæque eruditionis copia floren-
tium, SCHERZERI, puta, ALBERTI & FELLERI,
quos cælo receptos prospera fama quaquavorsum adhuc prædicat;
CARPZOVII item, OLEARII, MENCKENII, RE-
CHENBERGII, CYPRIANI, aliorumque, quos omnes
propitia rebus nostris divini Numinis clementia mortalium cœti-
bus longissime interesse velit, pulcherrimas doctrinas haurire
contigit. Fateor enimvero tanta me alacritate ad scholas ipso-
rum, cum aliis quos idem ardor agebat, confluisse, quantæ so-
let esse in animis eorum, qui accenso studio incitatoque cursu ad
verum decus, quod in bonarum artium tractatione positum esse
rectissime existimatur, laudabiliter grassantur; qui persuasus
eram, quod & sæpe cognitum est postea, tantis me præceptoribus
solidioris sapientia restringere sitim, ducibusque istis, quantum-
vis arduum id sit & paucis indulgeatur, ad edita Musarum fe-
liciter eniti posse templa. Quicquid ergo vel in ecclesia DEI,
cuius abundantissima gratia suum me ministrum constituere di-
gnata est; vel in schola, in qua studiosam iuventutem divina
buna-

humanaque sapientia imbueri iubeor, praestiturus sum deinceps; id vero, post supremi Numinis exuberantem in me benignitatem, tibi, celeberrima Philurea, refero acceptum. Illud quidem habuisssem in optatis, ut studia mea & operam in perpetuum tuo servitio addicere licuisset; quis est enim tam ab omni humanitate alienus, ut, cui tot meritis tenetur obstrictus, patria amore imprimis non teneatur? Sed, qua ratione mihi fuisset integrum, divina voluntati, tam luculentis argumentis ostensa, proterve reluctari? Id tamen, quod est in viribus meis collocatum, sincere tibi polliceor, nullum fore tempus, quo non memoriam tui tuorumque, qui tot beneficiis me sibi devinxerunt, libentissime usurpem; & id sedulo agam, ut tuum decus, quantum adsequi possum, asseram, tuear, & propagem; ut qui omnia, non modo qua possum, sed & qua non possum, tui causa percipiam. Deum interea precibus ardentissimis adpello atque inuoco, ut qua adhuc effloruisti, ad multorum invidiam rerum, omnium abundantia, libertate praesertim colenda religionis ab omni superstitione emundata, & quo eminuisti rerum praestantissimarum splendore, hac tibi omnia sint perpetua; utque viros, quos possides in omni genere virtutis & doctrina perquam excellentes, & meritis in rempublicam gravissimis celeberrimos, diutissime orbi litterato venerari liceat. Ita & semper emittas in omni facultate, in praesidium generis humani & solatium, iuvenes omni eruditione & virtute perpolitos & ornatos; ita me quoque tuis accenseri ne desinas; qui emoriar,

SVAVISSIMA MATER,

Celeberrimo tuo Nomini

SERVESTAE
 ipsis Calendis Ianuariis
 A.O.R. clj l3 CXCLIX.

æternum devotus

IO. GEORGIUS PRITIVS.

SERENISSIME PRINCEPS,
DOMINE CLEMENTISSIME;

V I R I

*Illustres & Excellentissimi ; Maxime
Plurimumque Reverendi,
Nobilissimi, Amplissimi, Experientissimi,
Clarissimiq;*

Tuque florentissima Iuuentutis studiosa conſcio.

* * * * *



Quod vnquam futurum eſſe ſperare vix per
vitæ meæ tempus auſus fui, vt tradendæ
ſublimiſſimæ ſcientiæ, quam Theologiæ
vocabulo adpellitare nobis ſolenne eſt,
adhiberetur induſtria mea; id nunc præ-
ter omnem exſpectationem meam, &
propemodum etiam vota, quibus res alias
maximas complecti ſolent cupidiffimi
mortalium animi, ſingulari Numinis præpotentiſ ſuoque ſa-
pientiſſimo omnia temperantiſ moderamiſ, hodierno die
contigit prouidentia. Quam Sereniſſimiſ auſpiciis oblatam
mihi nuper prouinciã ornare dum aggredior, non diſſiteor,
metem meam, multiplici alias ſolicitudine curiſque ſauciam,
cogitationibuſ variis commoueri & tantum non percelli. Equi-
dem ita animum meum induco, ac in ea ſum opinione, quum
omneſ, qui in rudiori ætate ad præclara quæque capeſſenda
vtiliter formanda, & in honeſtiſſimarum artium ſcientiis

iuventuti impertiendis, suam consumunt aetatem, difficultates sibi obiici sentiant maximas; tum vero illos, qui, posthabitis ceteris omnibus, ad rerum diuinarum notitiam, aliis communicandam studia atque cogitationes suas contulerunt, cum magnis laboribus constricti, & summam in suscepti muneris administratione difficultatem experiri oportere. Quicquid in reliquarum disciplinarum complexu continetur, id omne exquisito rationis humanae, recte sese habentis, lumineque suo, quod habet in se, sese perfundentis, scrutinio patere manifestum est: at vero princeps omnium scientiarum sacrosancta nostra Theologia, non nisi ex Dei, benignissime cognitionem sui cum hominibus communicantis, reuelatione hauriri atque constare potest; quam ut recte atque cum salutari fructu intelligas, ipsius doctoris optimi, sancti Spiritus, quo impulsore locuti sunt, qui absconditas de rebus diuinis doctrinas nobis tradiderunt, gratiosa illuminatione opus est; ad istam vero adsequendam continuum precum exercitium, fideique, robore suo vigentis, feruidissima nec vnquam interrumpenda colluctatio requiritur. Iam si reputemus quoque nobiscum, in eo primariam theologiae occupationem versari, ut pulcherrimam illam imaginem, qua viuide in homine se representare volebat Deus, quamque heu nimis infelici lapsu! perdidimus miseri mortales, in nobis, quantum per hanc vitae humanae fragilitatem licet, restituatur; dici non potest, quam arduum hoc tediumque plenissimum sit opus. Hoc enim ut praestari possit, necesse est, ut homo bellum sibi indicat ipsi, sibi que ipsi colluctetur: quod est, non actus saltem suos in speciem ad honestatis formare regulam; sed ebullientium cupiditarum reprimere vehementiam, desideriisque corruptae hominis naturae, suauitatibus suis nobis ad blandientis, repagulum obicere, quantumque fieri potest libidinibus omnibus interitum adferre. Quod quam magnum sit, quam

opc-

operosum, quam lubricum, quam ægre sustinendum, illi sciunt vel maxime, qui, quamvis auxilii diuini fiducia nitentes, enervare concupiscentias suas atque edomare conantur, quique sensibus pristinis, quatenus a Deo auertuntur, crucem designare constituerunt. Hæc autem, quod pertinet in primis ad functionem rerum diuinarum intelligentia animos hominum imbuentis, inculcare ætati, in deteriora fere proclui, & peruersis deprauatæ carnis consiliis obsecundanti, quanti quæso esse arbitramini, Auditores? Nisi me fallunt omnia, aut prouinciã non potero explere demandatam, aut exuendæ mihi erunt multæ, quibus fruitur mortalium vita, dulcedines; atque illæ imprimis, quibus homines, a gratia diuina destituti & vacui, inflammatis inhiant studiis, deliciæ; præterea nuntius mittendus erit rebus plurimis, quibus pretium mortalium, aliquando non pessimorum, fortunam suam sibi fingere volentium, ingens constituit alacritas. E contrario conuertendus ad Deum erit animus,isque indefessis religiose inuocandus precibus, ut mentem hanc spissis, quibus a natura obsidetur, tenebris caliginosæque nocte liberatam, sancto suo lumine complere lucisque æternæ radiis collustrare ac illuminare dignetur. Præsertim & exempli hic bonitas postulatur, in quod intuentes qui præeuntem sequi debent, quod efficacissimum docendi genus habetur, mature ad virtutis omnis exemplar elaborentur ipsi. Quid dicam amplius? quot subeundi iam erunt labores, quæ deuoranda fastidia, quot peruigilaciones suscipiendæ, in auctorum huc pertinentium euoluendis cum curâ lucubrationibus? Quæ cum pensculatiùs considero singula, mentisque accuratori lance trutino, quam minime ego ab iis rebus sim instructus, quas exposcit sane grauissimi muneris conditio, si tamen egregia inde vtilitas ad rem publicam redundare debeat, per me ipsum facile perspicio. Non inficior equidem, me, quoad pueritiæ memoriam possum recordari vlti-

nam, & in temporis præteriti spatium respicere, mentem meam sanctissimæ disciplinæ amore inflammata, quantum per fortunæ aduersantis iniquitatem licuit, ardentem in eiusdem placita incubisse semper; nec pœniteret operæ & exantlatorum cum corporis quoque afflictione laborum, si, qui mea, causa volunt & bene mihi cupiunt, non plane adspernari de me beneuole errantium velim iudicium. Sed quam vix sit in homuncione hoc aliquid, quod par esse possit rebus agendis, ego, qui exploratius me habeo cognitum & perspectum, omnium optime sentio atque experior. Sed quid faciam? non est profecto abiicienda hasta, quam semel arripui; in id contra omnibus viribus enixe contendendum est, ut hominum prudentissimorum expectationi, quantum industria adsequi possum, satisfaciam. Obtempero igitur Deo in messem suam me vocanti, sanam rerum cœlestium doctrinam studiosæ Iuuentuti, pulchre in præsidium patriæ nunc adolescenti, ex hoc loco imposterum, quanta a me fieri potest alacritate explicaturus. Antequam vero id fiat, pro laudabili more atque consuetudine inde vsque a maioribus obseruata, non nihil verborum solenni oratione ad vos, Auditores splendidissimi, faciendum esse intelligo. Nec vero longius argumentum arcessendum esse, & cum sollicitudine inquirendum, censeo. Non facile, abir hebdomas, qua non aliquid vel Roma, vel Parisiis, vel aliis ex locis, de acerrima contentione, quæ illustrissimo Archiepiscopo Cameracensi cum aliis quibusdam eminentissimæ dignitatis Præsulibus intercedit, in relationibus publicis nobis adferatur. Digna res nobis visa est, quæ, quantum per temporis rationem licebit, hac occasione in notitiam vestram adducatur; ut non pateat tantum totius actionis facies, sed & quid de nobilissima hac, in quam non Romana tantum sed vniuersa quoque Protestantium ecclesia expectatione erecta est, causa habendum sit; quidque exinde contra potestatem

tem Papæ, quam sibi arrogat, ferendæ de controuersis circa fidei capita sententiæ, omnis erroris nesciæ, confici iure possit, omnibus euadat manifestissimum. Illud vero, antequam ulterius prouehatur oratio mea, a vobis, Auditores omnium ordinum honoratissimi, enixissimis precibus contendo, vt ad breue temporis spatium de re insignis momenti dicturo aurium beneuole operam commodare, fauoreque vestro & benevolentia subleuare indifertum me oratorem, ne dedignemini; qui daturus sum operam, vt genere dicendi perspicuo argumenti dignitatem, quod alia re facere mihi negatum est, commendem.

Vt autem a fonte totius controuersię ordiamur, originem disceptationi dedit editus a Francisco de Salignac Fenelon, Archiepiscopo & Duce Cameracensi, viro non minus spectatæ apud suos doctrinæ singularisque dexteritatis, quam pietatis etiam humanitatisque præstantissimæ laude conspicuo, libellus mole exiguus; quo tamen vniuersam sublimioris indolis theologiam, quam mysticam vulgo nuncupant, veluti in breui aliqua tabella orbi christiano exhibuit: quem, si vim tituli, Gallica lingua consignati, recte adsequimur, Explicationem præceptorum hominum sanctorum de vita interiori, inscripsit. Quum enim videret vir acumine mentis pollens, & circa cauendas in rebus spiritualibus deceptiones sedulus, facilem esse in maxime ambiguo istoc argumento in partem vtramque lapsum; nimis aliquibus theologiæ hoc genus, veluti fidei aduersum, & inanibus speculationibus, re ipsa casis, singularis sanctitatis speciem superbe vsurpans, temere adspersantibus; aliquibus ex aduerso in tanti momenti dogmatibus non satis commodis verborum formulis se explicantibus, vel in errores quoque grauiores reuera incidentibus; suarum arbitratus est partium, obuiam ire abusibus errandique occasionem omnem sapienter præscindere. Mysticos

p. 115.

igitur explicaturus accersit ad laborem istum; hoc ipso expectationes atque expressiones Sanctorum, quos vocant, illustrare se posse, & id efficere confusus, ne profanorum amplius hominum derisioni atque ludibrio patentes euilescant & contemptim habeantur. Id ipse Archiepiscopus, quum ad Pontificem Romanum hac de re litteras exararet, his verbis significat, quibus, quod ad scribendum de Vita ascetica & contemplatiua animum suum conuerterit, hoc inprimis fuisse ait, quod Sanctorum sententias, a sancta Sede toties comprobatas, ab aliis in flagitiosissimos errores sensim detorqueri, ab aliis scilicet imperitis ludibrio verti, iam dudum animaduertisset. Hinc ergo natus ipsi est libellus iste non adeo magnus, sed rebus tamen, quod patet, præstantissimus. Per articulos vero visum est Auctori illustrissimo rem omnem diuturna meditatione apud se pensitam, lectorum conspectui proponere: quorum vnumquemque in duas veluti partes dispescit, quarum vna, quod ad veritatem accedat; altera vero, quod veritati repugnet, in orbe omni totius theologiæ mysticæ repræsentat: persuasus, hac ratione ad liquidum veritatem explorari, fraudesque atque fallacias ex latibulis suis, quibus lateant absconditæ, excuti posse. Primæ pars definitiones fere complectitur phrasium, quibus, qui de hoc argumento commentantur, uti consueuerunt; quod eum in finem a se fieri dicit, ut genuinus illarum sensus omni ambiguitate euolutus, quibuscunque controuersis examinatur. Articulorum parte altera monstrandum sibi sumit, quænam sint illæ conclusiones, quæ ex falsis initiis primo positæ, ad animas, sub imagine eminentis alicuius in fide pariter & moribus perfectionis, periculosissime decipiendas, prout quasi deriuentur alueo. Ad duo autem, si de libri totius summa velimus inquirere, capita redeunt omnia, quæ ab Archiepiscopo dicuntur, prout in epistola, ad amicum missa, ipse nos docet. Primo enim caritatem animæ fidelis erga Deum

p. 116.

. amo.

amorem sciscit esse purum, ita ut Deus propter se ametur tantum, non habito ad beatitudinem amantis ipsius respectu in ipso reperendam. Alterum est, quod in vita animarum omnium perfectissimarum, caritas reliquas omnes anteuertat virtutes, utpote quæ animet ipsas, ac inciter, ipsisque suos iungat actus ad finem quemque suum dirigendos. Ut primum illud caput exactius teneamus, scire iuuabit, amorem, quomentes fideles erga Deum correptæ flagrant, non vnius generis statui a Præsule nostro. Tres enim diuersos esse gradus aut status iustorum, quamdiu terram, humani generis domicilium, inhabitant, adseuerat. Primo videlicet esse, qui Deum quidem ament præcipue; sed hunc tamen illorum amorem, quamuis sit affectus primarius & dominatum habens, nonnihil admixti tenere timoris, ne vtilitari propriæ minus consulatur. Esse deinde alios, qui magis adhuc amore in Deum ferri dici possint, præ rebus aliis præcipuo; cui tamen & ipsi, quantumuis reliquos omnes affectus emineat, spes felicitatis propriæ hinc consequendæ adhæreat. Esse denique multis, quos hactenus memorauimus, perfectiores, qui amore erga Deum ardeant purissimo; utpote quos nulla emolumentum proprii ratio ad Deum eximia ista caritate complectendum impellat, sed illa tantum, quæ ad amandam pulchritudinem diuinam in & per se moueatur. Primum amorem iustorum quidem esse, sed qui nonnihil adhuc habeant spiritus seruilis; alterum esse iustorum, quos adhuc tenet spiritus mercenarius; tertium denique esse illorum, qui filii demum Dei mereantur nuncupari. Hoc ipsum esse, quod postremorum temporum auctores aliis quidem, sed idem valentibus, adpellitare soleant nominibus. Tres enim ipsos vias comminisci: vnam purgationis, in qua homines non amore tantum modo Dei, sed & metu pœnarum infernalium concitati debellant vitia; alteram illuminationis, in qua studio quidem virtutis feruenter pro-

p. 1.

progrediantur, sed vt hinc eos amor diuini Numinis, inde spes felicitatis æternæ consequendæ exstimulet; denique viam contemplationis, siue vnionis, in qua filialem timorem nunquam aliquis deponat, nec spem, qua ducuntur filii Dei, abiiciat: licet homines hoc in statu dum sunt, nullo vel ex metu vel ex spe emolumento adducti; sed puri amoris exercitio tranquillissimo, Deo vniantur. Ista omnia vt adhuc euadant clariora, lubet ea, quæ in limine statim sui operis de diuersis amoris gradibus præmittit Auctor, breuissimis recensere. Primo enim homines dari, inquit, qui Deum amare profiteantur, quem tamen non ament, sed bona varia ab isto distincta, quæ, a diuina potentia dependentia, confidant se a Numinis benignitate esse impetraturos; tali amore Iudæos carnales Deum memorat complexos fuisse, legis præcepta, propterea obseruantes, vt benignis cœli influxibus, & vberi ex terra rerum prouentu, fruerentur. sed hunc amorem, prorsus censet seruilem, quippe qui non in Deum, sed in seipsum desinat. Deinde Deum amari posse, vt medium saltem se reddendi felicem; vt Deus beatitudinis humanæ habeatur instrumentum, qui ad se ceu finem vltimum referatur. hunc amorem pure esse mercenarium; inde & eundem amorem concupiscentiæ nominat. Huic succedere amorem spei, cum Deum aliquis incipit amare propter ipsum Deum, sed ita tamen, vt suæ quoque rationem habeat felicitatis; ita vt magis adipiscendæ suæ felicitatis causâ, quam Dei, amore diuino inflammetur. Sublimiorem adhuc esse amoris gradum, quando aliquis Deum amat tam cupide, tam caste & emendate, vt omnem ei suam felicitatem postponat: non quidem, quod suo non hic quoque prospiciat commodo; sed quod amorem suæ felicitatis, amor, quo Deum amat, sincere atque reuerentur subiiciat: qui amor longe sit perfectior, quam illi, quos recensuimus hætenus & descripsimus, amoris gradus, sua ta-

men

men illum adhuc imperfectione laborare. vnde istum demum esse amorem purum atque perfectissimum docet, quando Deum ament piæ Christianorum animæ, nulla propriæ utilitatis exinde ad se redituræ aut felicitatis spe adducti. Huc fere respiciunt omnia, quæ in toto hoc Archiepiscopi libro habentur: qui sane tam perspicue eoque linguæ nitore perscriptus est, ut sine nausea omni euoluatur, ab iis præsertim, qui libris, rebus profundis refertissimis, capiuntur. Nunc si placet videbimus, quem euentum habuerit viri eruditissimi labor, & quam varie ab hominum iudiciis fuerit exceptus. Statim ac vltimam libro consignato imposuisset manum, ad eundem in linguam Latinam conuertendum curas & cogitationes suas conuertebat; istum tamen, ut erat Gallicò idiomate concinnatus, ad Pontificem Romanum cum litteris obseruantia suæ obsequiique plenissimis deferendum curabat, summa cum animi submissione supremi post Christum iudicis, quæ falsa persuasione tenetur, iudicium expetiturus. Gratissimum fuisse munus Innocentio XII, rerum nunc domino, litteræ ipsius ad Archiepiscopum testantur, quibus gratias pro misso ad se munere ipsi agit, quibusque significat, & pergratam sibi accidisse missam ad se Archiepiscopi epistolam, & se in præclara opinione, quam de zelo, quo flagret ipse in adimplendis sui muneris partibus, gessisset, haud leuiter fuisse confirmatum. Quis vero non existimasset, reliquos, qui Romano Pontifici seruitio addicti parent, ordinis sacri homines, Patris sanctissimi secuturos fuisse sententiam? Sed omnia alia expertus Cameracensis est. Statim enim postquam in Gallia hæc mysticarum rerum explicatio disseminari & legi auide cœpisset, insurrexerunt in ipsum Præsules tres, in magno dignitatis fastigio constituti, nec minoris in ecclesia Gallicana auctoritatis, Ludouicus nempe Antonius de Noailles, Archiepiscopus Parisiensis; Iacobus Benignus Bossuetus, Episcopus Melden-

*Instructio
Pastoralis
p. 224.*

Declamatio Episcopi p. 204. seq.

sis, variis aduersus ecclesiam Protestantium molitionibus ingentem apud suos famam adeptus; & Paulus denique de Godet, Episcopus Carnotensis: qui edita Declaratione prolixiori libellum Fenelonii vehementer perstringunt, variorumque grauiſſimorum errorum postulant; atque inter alia hæc docent esse intolerabilia, quod, si Archiepiscopi dogmata sectemur, omnis spes theologica, cum extra gratiæ statum, tum inter perfectos in ipso gratiæ statu, tollatur: eo quod ante iustificationem amore spei ita dicat amari Deum, ut in eo amore amor sui, proprii nempe commodi siue propriæ felicitatis, tanquam præcipuum incitamentum dominetur, ipsique, qui ex diuinæ gloriæ studio existit, impulsui præualeat; vnde prona consecutione efficiatur, spem non theologicam virtutem esse, sed vitium. Post iustificationem vero, in statu perfecto, siue amoris puri, eam spem ab ipso induci, quæ, cum quidem sit in animo, animum tamen non moueat, quippe in quo amor sit purus, cui nihil vel timoris vel spei ob rationes proprias sit admixtum, animaque nunquam vtilitatis propriæ intuitu ad officii sui obseruationem excitetur. Vnde illud eos inprimis male habere viderur, quod in statu hoc perfecto, nullo iam mercenario vtilitatis propriæ desiderio, ex mente Cameraensis, homo teneatur. Quia & multa esse in articulis Præsulis, quæ infamia Molinosii, & qui ab eo originem ducunt, Quietistarum condemnata iam pridem dogmata præ se ferant; quale sit, quod actum continuum, omnibus Scripturis Patribusque inauditum, absurdissimumque errorem a Quietistis in statum perfectionis inuectum, sub nomine placidæ cuiusdam & æquabilis vniformitatis, denuo lectoribus suis propinauerit; quodque orationem quietis & ipsam contemplationem in purissimo amore, qui non modo per se iustificet atque purificet, verum etiam consummet & perficiat, consistere statuatur. Nec substitit intra declarationis nudæ terminos contradicendi.

di in Præfatis studium ; sed grauissimas præterea ad Gallia Regem detulerunt querelas, pessimum aientes esse hunc librum periculosissimumque, id quod tum Episcoporum tum Doctorum unanimi sententia confirmetur. Quibus ille commotus, non liberorum duntaxat regionum, quorum ætati ad pietatem atque honestatis studium formandæ ipse præpositus erat, curam ei & inspectionem ademit ; sed scriptis quoque ad Papam litteris litem hanc eidem denunciavit, petitque, vt controuersæ, contendendum ardore latius sese indies diffundenti, iudicio suo atque censura quam celerrime finem imponat. Quid Papa ? Rem decem examinadoribus accurato studio perstruendam committit : qui tamen, quod mirum est, in duas æquales partes discinduntur sententiis ; quinque ex his omnia libri capita, etiam illa, quibus teterrima hæreseos nota ab accusatoribus Viri illustrissimi impingitur, suo calculo adprobantibus ; quæ reliqui quinque summopere improbant, & veluti capitales errores reiciunt. Quid multa ? oportet summum ecclesiæ caput decem illis arbitris duos adiungere, alios, viros eruditione præstantissimos, Cardinalitia quoque purpura effulgentes, Norisium ac Ferrarium ; hac spe se sustentans, futurum esse, vt doctrina & prudentia virorum istorum tantimomenti negotium iuxta Scripturam, scilicet, Conciliorum canones, & Patrum doctrinam componat. Equidem qui Cameracensis partibus sunt addictiores, non verentur adferere : quod examinadores in partes abierint diuersas, id non a materiæ, quæ facillime expediri possit, difficultate esse ; sed ab aduersariorum, quos habeat infestissimos reus, examinadores suffragii & fauoris prensatione sollicita suos facientium, solertia. Protrahitur inde actio, nec, si, quæ sit ratio agendi, consideramus, tam cito ad finem perducipotuit. Congregantur Cardinales qui sanctum, quod dicunt, Officium constituunt, bis singulis hebdomadibus, die Lunæ atque Mer-

p. 267.

*Lettres Hist.
riques mois de
Mars 1698.
p. 245.*

*Mercurius Hist.
rique mois d'
Août 1698.
p. 125.*

Ibid. p. 126.

*Die 27. Sept.
Mercuri Hi-
storique Se-
ptembr. 1698.
p. 256.*

curii, audiuntque vna vice vnum vel duos examinatores; Iouis vero diē iidem Cardinales coram Papa se sistunt, in quo conventu duo semper examinatores ea referunt, quæ diebus aliis coram Cardinalibus iam dixerant prolixius. Vbi quidem tam lento gradu progressus datur, vt mense Iunio huius anni nondum de prima propositione satis dixerint, quum tamen de triginta & pluribus expromenda ipsorum sit sententia. Sed Romæ non tantum a viris doctissimis supra causâ hac disceptatur; sed aliis quoque in regnis rerum diuinarum doctores in partes venerunt. Vt enim ex relationibus publicis accepimus hætenus, in Academia Salmanticensi, quæ in Hispania floret, instituta congregatione, theologi decreuerunt, non esse reprobandas opiniones Archiepiscopi laude dignissimas, & scripta huius argumenti non statim esse execratione deuovenda; in hanc vero, additur, sententiam ipsos iudicasse de hac controuersia propterea, vt vlcerentur affectus suos erga Sorbonam, librum Mariæ de Agreda haud ita pridem inepte condemnantem. quanquam alii compertum esse velint, diuersum ab hoc iudicium ex collegio isto prodiisse. Non minus & Lutetiæ Parisiorum celebratissima illa Sorbona velitationibus istis permista fuit. Quum enim Fenelonius in vrbe Roma diuulgari per suos curauisset, doctores Sorbonicos, nisi Regis obtineret, quæ metuenda ipsis sit, auctoritas, in Archiepiscopi sententiam per omnia esse discessionem facturos; Papa Romanus articulos illos, qui liri præbent materiam, & quos ad numerum duodecim constrinxerat ante, Parisios misit, vt Doctores illi, fama eruditionis celeberrimi, animi sui sensa circa eosdem exponerent: quorum quidem plures quam centum ipsos veluti erroneos obelo confixerunt, damnandosque esse censoria sententia iudicarunt. Hæc & alia dum aguntur & in Gallia, & Romæ, & locorum alibi, non defuit sibi profecto Archiepiscopus, quamque semel tuendam suscepit

caus-

causam, eius strenuum defensorem se porro præstitit. Statim enim ac tres illi in Gallia præfules Declarationem contra eundem ediderant, ille emissâ in publicum Pastoralî Instructione, quæ obiiciuntur, non artificiose tantum diluit, sed & mentem suam circa ea, quæ dubitationis quidpiam habere videri possunt, plenius explicat. Hoc in libello simul virorum præstantissimorum suam in rem allegat auctoritates, tam Patrum, quî primis ecclesiæ seculis floruerunt, laude pietatis illustres, quam theologorum quoque mysticorum, qui superioribus temporibus theologiam hanc magna nominis sui celebritate excoluerunt. Factum hinc est, quod fieri eiusmodi occasionibus adsolet, vt libris vltro citroque editis, magna animorum acerbitate dimicaretur, Meldensi præsertim episcopo Cameracensem infenso admodum animo oppugnante; cuius hunc tamen ictus & fortiter adhuc sustinuisse, nec minori dexteritate atque præsentia animi aggressorem suum ab inferendis sibi vulneribus depulisse, adparet. qui & conquerendi ansam se sæpe habere clamat, quod Bossueti scripta, in se contorta, publice in viis & comitis proflare permitterentur; sua ex aduerso simul ac lucem adspexissent, crudeliter supprimantur: iniquissima agendi ratione, qua populo, harum rerum intelligenti, omnis de quaestione ferendæ sententiæ occasio subripiatur, occupatis contra se variis criminationibus hominum animis; & nullo sibi relicto medio, quo suam innocentiam, refutatis aduersariorum suorum accusationibus, ad liquidum deducere possit. Harum omnium rerum licet ignarus non sit pastor iste vniuersalis, cuius erat ante omnia officii, id prouidentissime curare, ne respublica christiana detrimenti quidpiam acciperet; passus tamen hæcenus est, lente, vt diximus, admodum procedere examinandi libri laborem; vt necdum, quem exitum habitura sit controuersia, quidque de Archiepiscopi opinionibus sit statuendum, orbi constare queat. Quamuis qui in aula Ro-

mana versantur Regis Galliarum ministri non desinunt sollicitissime sanctissimum Patrem sui nomine Regis admonere, adiunctis exquisitissimis etiam precibus, ut demum prolata sententia litem difficillimam, pro ea, qua pollet, auctoritate gratiaque diuinitus concessa, vel tandem dirimat; non obscuris in Meldensem sociosque studiis, odioque in Cameracensem manifestis. In contrariam interim partem feruntur hinc inde hominum iudicia, quorum multi Archiepiscopi partes amplexi, rem pietatis ab eodem strenue agi laudabilique conatu prouehi contendunt. Plurimi autem, & fortasse maior pars, auerso ab hoc genere theologiae animo, crassissimos errores a Viro sub imagine eminentioris sanctitatis inuchi, & ipsum, qui eiectus iam diu sit ex ecclesiae pomœriis, Quietissimum intempestiuo ardore reuocari, vociferantur. Habetis, Auditores honoratissimi, breuissimis ea, quae tanto strepitu, tanta animorum commotione omniumque expectatione, in ecclesia Romana circa theologiam mysticam, ab Archiepiscopo Cameracensi noua veste indutam, eiusque aduersariis, aguntur. Nunc requiretis fortasse a me, ut quid de tota hac controuersia censendum esse nobis videatur, ea expromamus iudicii æquitate, ea animi moderatione, quam debet extra partium studia positus ad sententiam iuste ferendam adferre. Agendum ergo dicemus, si ita vultis, Auditores, quantum possumus, ea tamen oris libertate, qua animi sensa explicare in ea semper licuit Ecclesiae, quae non opinionibus hominum, sed immotis oraculorum diuinorum fundamentis, suam se superstruere fidem, & praesertim conscientiae libertate illibata gaudere gloriatur. Vbi tamen neutiquam negamus, arduum esse opus, magnisque difficultatibus circumseptum, nec minori periculo, ut & fallamur ipsi, & aliis ad errandum praebemus occasionem, expositum, suam in controuersis, quae in eruditorum gente saepissime feruenter agitantur, interponere senten-

tentiam. Profecto nisi quis aduersantium partium probe ingenium perspectum habeat, noueritque, quæ sint illa, quibus impulsus ad feralia bella accedant, quidque animo versent, vix poterit de vnaquaque parte recte arbitrari. Nam & hic videas non aliter rem geri, quam in bellis, quibus in orbe, qui regnis administrandis præfecti sunt, colliduntur: quorum longe alii sæpe sunt prætextus, cur ad arma prouolauerint, omniaque sanguine, cæde & ruinis inisceant, quam veræ causæ atque principia. Enim vero latent omnino in animis quoque eruditum, & quid dissimulemus? illorum etiam, qui sacris functionibus distinentur, affectiones admodum noxiæ atque turpes, quas abesse sane a mansuetissimis animis oporteret; quæ tamen quum excitantur paululum, dici non potest, quantacum vehementia in quantas turbas erumpant. Tales sunt, cupidus immoderata conciliandæ sibi in orbe vniuerso famæ, imprudens rerum nouandarum studium, intempestiua curiositas, inuidencia erga alios, quos supra se eminere atque æstimari cernunt, ferox contradicendi libido, inclemens omnia in sequiorem sensum rapiendi pruritas, pertinax, quod semel arreptum est temere, defendendi ardor, odium, quo erga eos feruntur, quos suis luminibus obstruere vident, mitigari nescium, turpissimus non de veritate, sed de victoriâ, contendendi conatus, male consultus in rem Dei zelus, & quæ sunt pestes reliquæ, magna perniciæ mortalium genus inuoluentes. Quod si ergo penitus haberemus introspectum, quinam sint habitus animorum in illis, qui nunc in aciem progressi tanta & inuadendi & repellendi aduersarii alacritate concurrunt, non dubium est equidem, quin de tota re dexteritate & circumspeditione longe maiori possit pronuciari. Quod quum negatum nobis sit, fingamus vtramque partem id quod agit, bono instituto, & animo non nisi ad optima quæque propenso, agere. Ut igitur ad rem ipsam accedamus paulo propius,

tradit, liber iste noua quadam ratione theologiam mysticam. Quo in loco ne expectetis a me, Auditores, vt quid sit theologia hæc, longa oratione explanatus vobis edisseram; nam id & paulo altius nos proueheret, & a viris omnium partium præstantissimis iamdudum fulissime est præstitum. Porro, quo in censu ea sit habenda? exterminandane sit ex limitibus christianæ reipublicæ, an colenda sit atque in deliciis habenda? sæpe quidem disquisitum fuisse meminimus. Nos id quidem videmus, neque Lutherum nostrum, virum sine controversia sanctissimis diuini Spiritus muneribus copiose & profluerenter exornatum, neque alios, qui ipsum insecuti sunt postea, theologos, pietatis studio feruentiores, adeo huius generis theologiam voluisse proscriptam, vt potius eandem ad sanitatem reuocatam, quæ sub horridis antea vocabulis tantum non laborabat, piis animabus de salute sua sollicitius satagentibus solerter commendauerint: quippe quæ iugem poenitentiam, rerum sub adspæctum cadentium caducarumque fastidium, ardens e contrario rerum cœlestium desiderium, peccatorumque fugam, summopere inculcat, & inordinatas animi concitationes iactationesque mentis incitatas suppressere subinde docet. Ac mihi quidem scripta euoluenti illorum hominum, qui suos inter magno feruntur encomio, Tauleri, Sufonis, Iohannis a Cruce, Theresiæ, Francisci Salesii, Bonæ, aliorumque, non diffiteor equidem, multa occurrere, tum quæ intelligentia mea non percipio, tum quæ mihi non videntur esse consentanea, tum quæ verbis obscurioribus & sensu vero destitutis dicuntur, tum & quæ plane a saniori doctrinæ forma abeunt: nec tamen id quoque negari vlla ratione posse video, adesse in eiusmodi auctoribus plurima, quæ quantiuis sint pretii, nec absque insigni christianæ religionis detrimento queant reici. Vt adeo neque improbanda sit eorum opera, nec frustranea, qui, quum saniori theologia sub-

acti

acti iam sunt, huius argumenti libros euoluunt; quamuis dissimulandum sit minime, ea omnia, quæ a mysticis traduntur, religionis capita, in theologia, quæ in nostra viget ecclesia, tradi æque accurate posse & proponi. Archiepiscopus igitur noster, ut eo se referat oratio vnde paululum discessit, in eorum voluit esse numero, qui in theologia mystica illustranda operam suam collocare e re esse censuerunt. Nec videtur sane ad sustinendam eiusmodi personam parum esse idoneus, utpote in Scriptoribus, vetustioribus non minus quam recentioribus, (quod requirebatur in illo, qui operam hanc suscipere audebat,) versatissimus. Ad eruditionem istam eximiam adiunxit præterea modestiam, veritatisque & pacis studium plane singulare. Ut enim ex literis eius ad amicum adparet, animo docili atque submisso petit ab omnibus, ut, si in aliquo errore hæreat, is ipsi perspicue demonstretur; si male se explicauerit, pati se posse affirmans, ut in melius reformetur, quibus minus recte fuerit usus, loquendi formulæ. Quod si res indigere videatur ulteriori explicatione, proficitur, ad hanc magna animi promptitudine addendam, studium se velle adhibere. Si vero Papa librum suum sit condemnaturus, primum se fore, qui & ipsum condemnet, eiusque lectione interdicit omnibus suæ curæ subiectis; hocce tantummodo a Pontifice Romano flagitaturum, ut loca adnotet ipsa, quæ sua censura notaturus est: si vero Papa hanc doctrinam non sit condemnaturus, suo se silentio conaturum esse dicit, fratrum sibi infestiorum animos, eaque sibi imputantium dogmata, quæ non minus ipse exhorrescat, lenire atque placare. Qui ita adfectus est animo, veritatem certe quærere, non hominum plausus capere videtur. Iam de libro quoque ipso, & eius argumento, si iudicare maxime velimus, erunt ante omnia in vniuersum, quædam obseruanda, quæ nisi attenderimus, æquum iudicium de auctoris alicuius opere nulla ferre ratione possumus.

p. 189.

Librum ergo, res in vsum atque exercitationem transferendas enucleatius tradentem, si ad examen quispiam reuocare instituerit, studiose attendat necesse est principio, ad quem ipse collineet scopum; quænam porro ad eundem consequendum adhibenda doceat esse media; & demum, quam dextre in mediis versetur adplicatione. Quod si scopus omnis huc redeat, ut amore mutuo Deus coniungatur cum hominibus; aut impedimenta, sanctissimo huic amoris intercedentia, remoueantur; erit certe liber ipse accensendus præcipuis, ac summum libri caput in bonis erit habendum. Quod si & ipsa media ad scopum attingendum adprime sint attemperata, sintque vel virtutes, vel quæ impedimenta saltem remoueant; eo magis opus ipsum cum laude erit excipiendum, quo magis viam, qua laudabilissimo potiamur scopo, expeditum commonstrat: si vero contingat, media quædam adferri, quæ in se vel minus bona & vera sint, vel ad finem suum minus apta & congrua, si modo ceteroquin talis vere est, quem diximus, libri scopus, non ideo statim capitalis est error exculpandus, aut hæreticus declarandus liber; id potius considerandum venit, an eius sint indolis media illa, quæ vel penitus scopum sustollant, vel an inpedimento sint, ne eum contingere valeamus. Quo in casu, si ab auctore ex mentis imbecillitate fuerit erratum, non accusandum eundem esse arbitramur, ac si scopum vel negare vel tollere voluerit; quin conueniens potius erit, blande eundem atque beneuole de hallucinatione commissâ admonere, atque edocere meliora: quæ si agnoscat, ob ingenuitatem laudandus erit; si vero ob caliginem menti offusam, nec errorem suum nec meliora agnoscat, scopum autem retineat, christianæ caritatis ac rationis esse omnino videtur, tantisper eum fraterne tolerare, quousque a Deo copiosiore lumine beetur; nisi sit euident, subdole agere hominem, ac quum scopum ipsum flocci pendat, media quoque, a scopo vero abducen-

ducentia, tanquam ad eundem conducibilia, commendare; & tum vero censura in eum est expedienda. At si media minus sint idonea, sed ex rerum minutarum genere, vnde non metuendum sit ingens detrimentum; quis esset tam inclementer morosus continuo, tam ab omni humanitate alienus, ut ad duriores temere prouolet censuram, ardoreque intempestive solerti tam leuiter erranti dirum hæreseos crimen dictatorio talamo impingat? Dissimulanda hæc sunt, pacis retinendæ causa, immo & excusanda, ut errata innoxia; nec, ubi obiter ista sunt refutata, pertinacius censuris insistendum est. Vt-terius, si bona adsit mentis voluntas, conatusque feruens hisce mediis eundi ad Deum; tanti res merito habenda est pretii, ut manca etiam media & mutila nullam operi adspargere maculam iudicari ab æquioribus debeant. Vnde denique, si scopus mediaque ad scopum, & mediorum adplicatio, recte sese per omnia habent; verba quoque aliquando duriora a pio & bene cupiente lectore beneuolum nanciscantur interpretem. Nam hac qui mente sunt præditi, non patientur sibi a modis loquendi adferri remoram; quibus satis est, clare se percipere scopum, & media nouisse, ad eundem se ducentia. Hæc omnia ut cum mitissima Christi disciplina præsertim conueniunt; ita qui velit de Præsulis Cameracensis placitis existimare, si obseruanda sibi putet, haud paulo liquidius, ab vtra parte stet veritas, perspiciet. Non vacat tamen nunc ire per singula, & quæ vel placeant, vel displiceant, in libro tot conuitiis appetito, demonstrare. Hoc video, quæ de amore puro commentatur Vir illustrissimus, nobis propterea non esse plane adspernanda, quod causam nostram contra Pontificiorum de operum bonorum, meritis commenta valide adstruant. Si enim in eum perfectionis gradum, quod auctoris nostri scitum est, adduci potest anima fidelis, ut nullam amplius commodi, nullam mercedis, nullam præmii rationem habet; immo si iste demum, ut porro

Strom. lib. II.
p. 485.

decernit, est amor perfectissimus; dari viam apparet, qua perfectissimi vel absque meritorum & bonorum operum subsidio in beata illa cœlorum regna enitantur. quæ est illa ipsa doctrina, quæ ab ecclesia Protestantium vniuersa immotis iam diu monumentorum sacrorum monumentis constabilita, pro capite sanctissimæ fidei nostræ maxime primario iure meritoque habetur. Sed fuerunt profecto, cur ista sanciret, Archiepiscopo non plane nullæ rationes, quum præeuntes haberet tot viros, meritis & pietate incomparabiles. A sua parte stantem habet Clementem Alexandrinum, cuius hæc sunt effata: δεῖν διμαί, μήτε διὰ φόβου κολάσεως, μήτε διὰ τινος ἐπαγγελίας δόσεως, δι' αὐτὸ δὲ τὸ ἀγαθὸν, περσεληλυθέναι τῷ σωτηρίῳ λόγῳ. Existimo oportere neque propter metum supplicii, neque propter aliquam doni promissionem, sed propter ipsum bonum, accedere ad verbum salutare. Consentientem habet Augustinum, cuius hæc est doctrina: fruitionem, ad quam semper tendit amor, non esse Dei possessionem, ad quam intuitu nostræ utilitatis contendimus; sed vnionem esse cum Deo, qua non Deus ad

Augustin. de
Doctrina christi-
ana lib. I.
cap. IV. p. m. 9.
Serm. 256. de
Tempore.
In thesauro
aestico Possini
opuscul. IIX.
cap. 20. p. 207.

nos, sed nos ad Deum toti referamur. *Frui, inquit, est amore alicui rei inbarere propter seipsam. Vti autem, quod in usum venerit, ad id quod amas obtinendum referre, sitamen amandum est.* Vnde & monet alibi: *Ipsam amemus propter ipsum.* Pollicem sibi habet prementem sanctum illum Macarium, cuius verba sunt ista: οἱ πρὸς ἀλήθειαν τὸν Θεὸν ἀγαπήσαντες, ἅτε διὰ τὴν βασιλείαν αὐτῶν δαλύειν πρόειρηνται, καθάπερ ἐμπορίας χάριν καὶ κέρδος· ἅτε μὴν διὰ τὴν ἀποκειμένην τοῖς ἀμαρτωλοῖς κολασιν· ἀλλ' ἅτε Θεὸν μόνον αὐτὸν καὶ δημιουργὸν ἰδίον ἡγαπηκότες, καὶ ἀκολυβία τάξεως ἐπιγινόντες, ἔτι δεσπότη καὶ κτίστη δούλους εὐαρεσεῖν ἰφειλόμενον. *Qui Deum vere amauerunt, neque ob spem regni elegerunt ei seruire, quasi mercatores lucrum, aut operarii mercedem captantes: sed neque ob metum præparata peccatoribus pœna; verum in illum, vti Deum solum es*

crea-

creatorem proprium, adfectu inclinati, ex recte conclusa inderatione consequenter agnoscetes, æquum ac iuste debitum esse, ut creaturæ conditori, serui domino, propter ipsam eius excellentiam, placere ac gratificari studeant. Et aliquibus interiectis pergit: καὶ δι' αὐφοτέρων γὰρ αἱ ψυχὰι τῶ κτίσαντι δοκιμάζονται ἵνα δηλοῖ σαφῶς γένωνται τίνες οἱ μὴ κέρδους αἰτίαν θέμενοι τὴν πρὸς ἐκεῖνον ἀγάπην· ἀλλ' αὐτὸν μόνον τῆς πολλῆς τῶ ὄντι καὶ φιλίας καὶ τιμῆς ἄξιον. Et per ambas istas res a conditore anima probantur; ut bis explorationibus manifesto adpareat, quales sint: mercenaria ne nundinatrices caritatis, questus sui causa Deum amantes; an solum propter seipsum eum diligant: quod illum, ut est in sua natura propria, citra respectum ad nos, omni dignum amore honoreque sciant. Nihil nunc dicimus de Tertulliano, Basilio, utroque Gregorio, Ambrosio, Hieronymo, Chrysostomo, Theodoro, Bernhardo, aliisque viris ecclesiæ Patrum nomine venerandis, ad quos, eadem vel similia docentes, confidenter prouocat ipse. Sed non ad hos tantum, sed & ad alios quoque, qui posterioribus seculis in ecclesia Romana magnam sanctitatis singularis famam consecuti sunt, nonnullis eorum in Sanctorum etiam tabulas cooptatis. ita enim Albertum Magnum, Thomam, Bonauenturam, Dionysium Carthusianum, Thomam Kempisum, Susonem, Rusbroschium, Iohannem a Cruce, Theresiam, Franciscum Salesium, aliosque plures, vel duces suos vel testes doctrinæ suæ ciere gaudet. Equidem quum circa hoc de amore purissimo caput omnis vertatur controuersia, credo id nunc a nobis requiri, ut, quousque is vel admitti vel reprobari debeat, ostendamus. Sed date veniam, Auditores, si in argumento omnium difficillimo delicatissimoque, aliorum potius respectem sententiam, quam aperiam meam. Referam itaque quæ nuper admodum in corona virorum præstantissimorum, quum altercationum istarum forte iniiceretur mentio, eruditissimis sermonibus vltro ci-

*Instructio
Pastorale p. 72.
sec.*

p. 107.

troque iactata, a me, vt sum earum rerum admodum curiosus, auribus atque memoria sunt excepta. Quum ergo ex amicis non nemo ex iis, qui congressum istum celebrabant, forte sciscitaretur, quem putarent demum illustrissimæ litis fore euentum? & quid sentiendum sit de isto amore, puro? statim vir canitie venerandus, & tum incomparabili eruditione, inprimis in rebus ad salutis negotium & res spirituales pertinentibus, tum & insigni vitæ sanctimonia, in magna apud omnes laude; excipiens sermonem, his verbis sui animi explicabat sensa: Tam indulgentem esse Deum, beneuolentissimum patrem, vt permitteret filiis suis eo ipso, dum sincero amore & ex grati animi studio præceptis suis obedienter se se attemperant, in præmia fidelibus promissa intueri. Quo fundamento omnes inniti tum prolixas illas promissiones, tum minas, quibus ad consecretanda ea, quæ sunt pia atque laudabilia, & ad fugienda secus se habentia, illos vult exstimulare. Quanquam enim iure suo perfectissimam obedientiam, nullo proposito præmio, ab iis, quos sua sinxit manus, poterat exposcere; in eo tamen ipsum summam ergo nos declarare benignitatem, quod, antequam ad bene agendum accingamur, eximiis pollicitationibus segnitiam nostram excitet. inde non displicere ipsi eorum obedientiam, qui vno veluti oculo in ipsius voluntatem & gloriam, altero in bona tam large promissa respiciant; quin & viros sanctissimos eo incitamento, veluti flabro aliquo, opus subinde habuisse, quo fidem & obsequium suum mandatis diuinis præstandum, exsuscitent; cuiusmodi de Mose dicitur, maioris ipsum probra Christi æstimasse, quam redundantes Ægypti thesauros, eo quod ante oculos haberet ingentia illa præmia in cælo sibi reposita. Nihilominus hunc omnino sublimiorem esse amoris gradum, quo & connitendum sit quam maxime, tam sincero animi affectu in Deum ferri, tam caste officia hominis Christiani obire,

re, vt nihil præter Deum attendamus; idem etiam facturi, si nec de cœlestibus gaudiis, nec de infernalibus cruciatibus, nobis aliquid esset inauditum. Immo, addebat, ista non intranudas animi speculationes consistere, sed fieri reuera posse, vt homo fidelis, gratiæ adiutorio subnixus, ad tam altum amoris fastigium adspiret; allegato in hanc rem admirando Pauli exemplo, qui pro fratribus suis secundum carnem execratione in æternum a Christo separari optabat. vnde conficere volebat, si amor erga fratres eo adducere hominem potest, quare non idem valeret efficere ardentissimus amor erga Deum? Nec deesse præterea alia virorum deuotissimorum exempla; similia de se testantium, quibus causa sit nulla, cur fidem non habeamus. Huic sermoni quum imposuisset finem vir summus, videbantur quidem multis hæc fortiter & christiane dicta, plausuque a quam plurimis excipiebantur singulari: sed aderat insimul vir quidam, elegantissimi ingenii acumine præstans, qui plane diuersum sibi persuasum esse adseuerabat. Vnde quum reliquos plenius eius mentem percipiendi desiderio teneri animaduerneret, altius ingressus, atque a primis vsque principiis rem repetens; negabat animam nostram aduersus quamcunque rem inclinare se posse, nisi quadam vi in mentem facta, quæ ad suam quærendam beatitudinem perpetuo eandem stimulet: quam propensionem a natura nobis insitam & penitus infixam erga felicitatem, tantam omnino esse, vt nulli rei amore nostro possimus inhærere, nisi quæ & in quantum nobis conueniat, hoc est, ad nostram aliquid conferre possit beatitudinem. Hæc vt probaret, largiri aiebat omnes, rem, vt amari possit, debere esse amabilem, & eiusmodi vt a nobis desiderari possit. nam fieri nulla ratione posse, vt res aliqua ab aliquo ametur, nisi aliqua ex parte cum ipso conueniat. hæcenus enim rem amabilem esse & desiderabilem, rem vnam esse atque eandem; quum in omnibus creaturis, vi intelligendi

Rem. IX, 3.

orna.

ornatis, amor re ipsa nihil sit aliud, quam desiderium sibi rei conuenientis. Hinc porro colligebat: quemadmodum ergo potest aliquis suo desiderio rei imminere, nisi sit in ipsa quidpiam, quo desiderium hoc ad se trahat? Quod si vero hic aliquis velit dicere: adesse perfectiones in Deo absolutas, bonitatem atque pulchritudinem tantam complectentes, quæ appetitum nostrum ad se alliciant; atqui, regerebat ipse, si perfectiones istæ absolutæ nullam habent conuenientiam cum nobis, nos quoque nullo alio respectu ipsorum tangemur sensu, quam qui sit plane indifferens, quique nos nihil omnino commoueat. Nonne enim prauī isti genii, æque ac nos, perfectionum in Deo absolutarum habent cognitionem? qui tamen adeo Deum non amant, ut horribili eundem prosequantur odio, hac ipsa ratione inducti, quod nihil exinde ad se in miserrimo rerum statu redundet utilitatis; quod fieri non posset, si perfectiones istæ idoneæ essent ad creaturarum amorem prouocandum. Sint ergo perfectiones istæ ingentes, id quidem habebunt, ut admirabilitatem possint conciliare, nunquam vero efficere ut voluntas nostra amore in easdem incendatur. Hæc ut melius comprehendantur, hoc a nobis, subiiciebat, sit positum: duo esse numina infinita, eaque perfectissima, quorum vnum in se veluti inclusum acquiescat felicitate sua, nec se extra se communicet; alterum vero suas perfectiones suamque felicitatem communicet rebus intelligentibus, a se productis, hominesque cum primis omni bonorum genere reddat beatos. Si ergo absolutæ duorum entium istorum perfectiones ab iisdem essent cognitæ, quisquamne existimet, pari utraque modo numina ista esse amabilia? an non vero locum hic habeat illud, quod ait apud Ciceronem Cotta: *Si maxime talis est Deus, ut nulla gratia, nulla hominum caritate teneatur, valeat.* Epicureorum hoc olim fuisse dogma, qui quum diuinam prouidentiam libertatemque sustollerent, pietate tamen Deum

Deum cohonestandum esse propter excellentiam professi sint. Quemadmodum, *si nihil aliud quereremus*, inquit Velleius ex Epicuri familia apud Tullium, *nisi ut Deos pie coleremus, & ut superstitione liberaremur*, satis erat dictum: nam & præstans deorum natura hominum pietate coleretur, quum & aeterna esset, & beatissima. habet enim venerationem iustam quicquid excellit.

Retulimus, Auditores, quantum memoria suggessit quæ diffusius tunc a viris clarissimis disputabantur; quorum quæ sententia firmiori innitatur talo, vos, pro animi vestri perspicientia, sapienter arbitramini. Mihi vero inter omnia ea inprimis placuerunt verba in Archiepiscopi libro, quibus in Instructione, quam vocat, Pastoralis monet; illos tanquam Antichristos esse respiciendos, qui inspirare fidelibus perfectionem cupiant; per quam ex oculis amittant Iesum Christum, auctorem, & consummatorem fidei. Sed nos quidem ad Pontificem potius Romanum conuertemus nunc paululum oculos, quem pro infallibili controuersiarum, in rebus fidei exsurgentium, iudice ab ecclesia Romana haberi constat omnibus. Ad eum vero a Rege Galliarum Præsulibusque, Cameracensi infestis, delata iam pridem, ut memorauimus, hæc lis est, suo ut arbitrio arduam & momenti maximi controuersiam componat. Verum in quantas difficultates se inuoluerunt illa, quæ existimantur, ecclesiæ columina? Quid enim? putantne posse finiri Pontificis sententia litem tantis animorum motibus agitatam, & vniuersam pene Galliam misere in partes distrahentem? Hoc cine vero est dogmatibus suis congruenter & constanter agere? Oblitine sunt, quod toties in ipsa Gallia firmatum stabilitumque est, veluti doctrina nulli dubitationi obnoxia: iudicium Pontificis non esse erroris nescium, nisi id vel in Concilio aliquo generali, vel cum consensu vniuersæ ecclesiæ ipse pronunciauerit? Quid proderit ergo Papæ sententiam elicere, qua si vel maxime contingeret damnari Archiepiscopum,

Ibid. cap. 17.

Instru. Pastorale p. 185.

Maimburg
Tmité Histo-
rique de l'Egli-
se de Rome, cap.
VI. p. 55.

ille tamen caussam haberet, cur censuram hanc adspernaretur, & effato stare nolit iudicis, quem æque labi posse ac se ipsum, auctoritate ac sententia Gallicanæ ecclesiæ sancitum atque ratum sit? Sed demus hic oblitos paullulum esse libertatis suæ ab vtraque parte Antislites; quid agat vero bonus ille Pontifex? nimirum anceps ille hæret, inter sacrum atque saxum consistens. Iam diu est, ex quo negotium excutiendi libri dedit viris quibusdam rerum scientia satis instructis: qui vero & in æquales partes discesserunt, & quæ in Archiepiscopo in Gallia non toleranter feruntur, ea in sanctissimorum virorum, ab ecclesia Romana sanctorum numero insertorum, scriptis vsu frequentata esse adfirmant. O infelicem iudicem! in tantas angustias redactum, ut quid agat, quid statuat, quem damnet, quem absoluat, cum ignarissimis sciat ipse. Damnet igitur Archiepiscopi dogmata? & eadem opera damnabuntur hæreseos crimine tot Patres, tot Sancti, in ecclesia Romana per tantum temporis spatium pietatis laude ubique celebrati. In propria ergo sæuiat viscera, & quos sua voce suoque calculo venerando Diuorum numero adscripsit, eos veluti maleficos, & infamia in posterum publice notandos, de sede cœlesti deturbabit? Ab altera parte petit Rex Galliarum, instat, vrget, & minando veluti iubet. & tamen is quid constituat, nondum liquet; moras autem neciendo, & cunctanter omnia agendo aperte ludificatur orbem. Sustineat ergo iudicium suum? Hoc nempe in more positum habent Pontifices, ut, quum in neutram partem sententiam dicere rationibus suis magis vident esse consultum, tacere malint, atque suspendere decretoriam vocem, quam, quid tenendum sit, in posterum, vltima sententia manifestum facere. Nouimus sane, quam tergiuersatus sit turpiter, in definienda de conceptione maculata an immaculata? Mariæ virginis controuersia, inter duos magni numeri ordines, Dominicanorum puta & Franciscanorum, per plura sæcula ingenti sæpe strepitu & summa offensione piorum disceptata; toties licet de vltima appellatus decisione, quin etiam ab Hispaniarum Regibus missis legationibus scriptisque litteris serio, ut pronunciaret demum, flagitatus: vsque dum, modo responderet, æternam sapientiam nondum patefecisse huius mysterii penetralia; modo interdiceret cunctis, ne scripto vel voce inter se hac de re contentionis funem reciprocare audeant. Ita erga & nunc tam iniquo videt esse se positum in loco, ut vix occasionem cernat, nisi ut sit, pisse mutus magis, se hinc eripiendi. Respicite huc, qui Romanum Pontificem,

tificem, Petri successorem, lapsus omnis expertem agnoscitis atque veneramini. Nondumne videtis ex causa hac luculentissime, quam lubrica res sit suprema Papæ auctoritas, quam fallax, quam nullo fundamento innixa? Si Papæ est, pronunciare de fidei controuersis, & ita quidem, vt falli sua sententia nequeat; & hanc potestatem ex successionis iure, inde a Petro vsque non interrupto ordine ad se deriuato, possideat; cur ipse iam hoc tempore non pronunciat, cur rem examinandam prius committit suis præsulibus, opemque alienam implorat, Petri successor? Quis enim velit negare, Apostolum tantum promptissima sententia liti huic statim potuisse imponere colophonem, edoctum quippe a diuino Spiritu, ea ipsa hora, qua interrogabatur, ea quæ oportebat respondere. Iam si, Luc. XII, 12 quod hic factum esse audiuius, discerpantur in partes æquales, quibus examinandi partes sunt demandatæ; si male librum intelligant; si peruersæ libri contenta referant; vel calumnientur dicta sensu optimo, pretio vel spe vel metu inducti; quale inde, quæso, sanctissimus Pater formabit iudicium? Cur Papa vero per se non videt? cur alii ipso vident melius? cur alii sunt instructi scientia copiosiori, iudicioque magis polent, quam Papa? Porro autem, si Papæ est decidere; cur in Gallia præfules, cur Doctores in Sorbona iudicium hoc præcipitanter occupant? cur Archiepiscopi librum crudeliter lancinant, configunt, supprimunt, eiusque lectionem tam seuerè prohibent? Nimirum & ipsi credunt, se, quid verum falsumque sit, liquido posse decernere; quare ergo trans Alpes audire demum velint, quid sit tenendum? Discite ergo vel tandem, si discere vultis, Papæ mancipia, Papam esse hominem; & errare posse, indeque sibi metuere; & plurima ignorare, etiam quum sedet in cathedra; & sæpe iudicare non posse; sapissime omnium falli, totumque orbem per tot secula astutissimis consiliis & offuciis fefellisse. Istud adhuc monere parum est, non habere vos causam, quare vel vestram in fide vnitatem tam superbe iactetis, vel nobis dissensiones subinde nostras infensiori animo obiciatis. De infinitis litibus, quibus inuicem colluctamini, quum satis alias pateat, patet vel hoc exemplo recentissimo, quam frustra de consensione fidelium omnium apud vos gloriemini. Nam quousque rixa illa vehementissima processerit, ipsimet videtis. Sed quid multa? Desperata est Pontificiorum causa, & ineptus sit, qui ineptias ac præstigias curiæ Romanæ non agnoscat; quas tamen ulterius iam persequi & explicare, non vacat. iam diu enim tempus erat, incomptæ orationis filum abrumper.

Ista vero, Auditores spectatissimi, pace vestra duximus, præmittenda laboribus nostris hoc in loco in posterum, quamdiu Deo visum fuerit, sufferendis. Ornanda nimirum nunc illa est sparta, quam *Serenissimi Principes Anhaltini, Duces Saxonia, Angria & Westphalia, Comites Ascania, Dynastæ Seruesta, Bernburgi, Ieuera item ac Kniphusii, Domini mei clementissimi*, humeris hisce meis imponere gratiosissime dignati sunt; quamque nunc subiectissimo animi studio libenter suscipio; sancte pollicitus, me in id esse elaboraturum impendio, ne tantorum Principum de me spei non respondisse videar. Daturus enim sum operam, quantum animi & corporis viribus eniti possim, ut illustis huius Gymnasii Anhaltini per me non deminuta, sed conseruata, & aucta etiam, esse videatur fama.

Salute ergo, quos adfidentes video, Doctores publici, Viri clarissimi, & quemadmodum studiosæ Iuuentuti viam ad edita Musarum templa præclare ipsi monstratis; ita, quaeso vos, ne dedignemini me in societatem egregii huius instituti laborumque vestrorum, laude omni dignissimorum, adfiscere. Si sententiis discrepamus in aliquibus, persuadete tamen vobis, me, licet de veritate religionis sanctissimæ, quam in Formula Concordiæ profitemur, in animo meo conuictum, & nunquam vel latum vnguem ab eadem discessurum; non tamen, ut quispiam a me opinionibus dissidet, ita eundem internecino prosequi odio. Ferre possum a me dissentientes, modo & mihi meam non inuideant libertatem. Interea pulchrum erit, officiis & bene merendi studio, amoreque inuicem certare. Hunc animum ego vobis sincere offero, similem promptitudinem fauorisque exuberantiam a vobis expectaturus. Salute & vos studiosi Iuvenes, salue pubes, in spem posteritatis educanda. Agite, qui discendi cupiditate estis inflammati, agite vero, confluite deinceps in scholas nostras: ego certe mea in docendo alacritate, vestrum in discendo feruorem excitare, alere atque conseruare, enixissime studebo. Credite, si quid est, quod mea industria bonarum litterarum vel iam mihi comparauit, vel in posterum sum acquisiturus, id omne vestris utilitatibus consecratum iri. Illud modo a vobis iure quodam meo postulo, ut vestra diligentia, vestro obsequio, vestro denique favore, meum studium meumque amorem erga vos, quod vestrarum mementote esse partium, studiose nutriatis. DIXI.